



Inatsisartunut ilaasortaq
Jess Svane, Siumut.

§ 37 naapertorlugu apeqqutip nr. 104/2026-p akineqarnera

Asasara Jess Svane

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaakka. Apeqqutit issuarneqartarput tamatumalu kingorna akineqarlutik.

Ulloq: 09-07-2026
Suliap nr.: 2026 - 11764
Allagaatip nr.: 26595136

Postboks 1160
Qqarasuaat: 34 50 00
Fax: 34 55 05
3900 Nuuk
Email: pn@naalakkersuisut.gl
www.naalakkersuisut.gl

- 1. Dronning Ingridip Napparsimmavissuani eqqiaanermut tunngasuni kalaallit sulisut arlallit sioqqutsisumik ilimasaarneqanngikkaluarlutik soraarsitaasimasut ilumoorpa?**

Akissutit

Peqqinnissaqarfimmit ilisimatitsissutigineqarpoq sulisut eqqorneqartut allakkanik tusarniaassutininik tamarmik nassinneqarsimasut soraarsitsinissanut tunuliaqutaasut nassuiaatigineqarlutik, aalajangivittoqartinnagulu oqaaseqaateqarsinnaanissaminut periarfissinneqarlutik.

Dronning Ingridip Napparsimmavissuani eqqiaqassat ilaat, tassaannerusut init ataatsimoorfiusartut, init napparsimasunik passussisarfiit pinnagit, neqeroortitsisarnermut malittarisassat naapertorlugit sumiiffimmi suliffeqarfimmut suliariumannittussarsiuunneqarpoq. Tassunga atatillugu Peqqinnissaqarfiup paasissutissiissutigaa, sumiiffimmi sulisut sulisartunik nunami allammiumik taarserniarlugit aalajangertoqarsimanngitsoq. Kalaallit suliffeqarfiat, suliassamut neqeroortitsineri ajugaasup, atugassarititaasut malittarisassallu isumaqatigiissutit iluanni sulisoqarnissaq nammineq oqaasissaqarfigaa.

- 2. Naalakkersuisut paasissutissiissutigisinnaavaat taamatut pisoqarsimappat sulisut qassit soraarsitaasimanersut, aammalu taakkunannga qassit kalaallinik aalajangersimasumik atorfeqartuusimanersut?**

Akissutit

Peqqinnissaqarfiup oqaatigaa, sulisut arfineq-marluk killiliussat atuuttut naapertorlugit soraarsitaaneramik ilisimatinneqartut.

- 3. Ilumoornersoq sulisut pineqartut soraarsitaanerminnut tunngavilersuutininik naammaginartunik tunineqarsimanngitsut?**

Akissutit

Sulisut pineqartut soraarsinneqarnissaminut tunngasumik ataasiakkaarlutik tunngavilersorneqartunik illuatungerisamut tusarniaanerup ingerlaneranut atatillugu tigusaqarsimasut Peqqinnissaqarfimmit paasissutissiissutigineqarpoq.

Tunngavilersuutigineqartut eqqiaanermut suliassaqarfimmi aqqissuussaannikkut allannguinnermut attuumassuteqarput, tassani suliassat ilai kalaallinit pigineqartumut suliffeqarfimmut nuunneqarnerat pissutigalugu sulisut suliffeqarfiup iluani atorfinitsinneqarsimasut pisariaqartinneqarnerat annikillismavoq.

- 4. Naalakkersuisut nassuiaateqarfigisinnaavaat soraarsitsinerit suliffiup iluani inatsisit atuuttut naapertorlugit pisimangersut, ilanngullugit ilimasaarineq, tusarniaaneq aammalu tunngavilersuineq pillugit maleruagassat?**

Akissutit

Soraarsitsinerit sulinnermi inatsisini aamma ingerlatsinnermut inatsisini aalajangersakkat naapertorlugit ingerlanneqarsimasut, ilaatigut nalunaaruteqarnissamut piumasaqaatit, tusarniaaneq sioqqullugu ingerlanneqartussaq kiisalu suliamut tunngatillugu naapertuuttumik tunngavilersuuteqartarnissamut piumasaqaatit ilanngunneqarsimasut Peqqinnissaqarfimmit oqaatigineqarpoq.

- 5. Naalakkersuisut ilisimavaat paasissutissat soraarsitaasut nalunaarfigineqarsimasut filippinerinik sulisunik taarserneqassallutik?**

Akissutit

Sulisut pineqartut paasissutissinneqarsimasut pillugit, taakkulu filippinerit sulisussanik taarserneqarnissai pillugit paasissutissanik Naalakkersuisut ilisimasaqanngillat.

Peqqinnissaqarfimmit aamma paasissutissiissutigineqarpoq sulisut soraarsitaasut filippinerit sulisussanik taarserneqarnissaat pillugu ilisimatinneqarsimanngitsut. Peqqinnissaqarfimmit aamma ilisimatitsissutigineqarpoq, sumiiffimmi sulisut sulisartunik nunami allammiunik taarserniarlugit aalajangertoqarsimanngitsoq. Suliffeqarfinnik neqerooruteqartitsinnermi ajugaasoq nammineq sulisut pillugit inatsisit atuuttut atugassarititaasullu malillugit aqqissuussinissamut akisussaaffeqarpoq.

- 6. Tamanna ilumoorsimappat, sumi tunngaveqarpa najukkami kalaallit sulisunik nunanit allaneersunik sulisunik taarserneqarsimanngitsoq?**

Akissutit

Apeqqut 5-imut akissut innersuussutigineqarpoq, tassani takuneqarsinnaavoq sulisut nunatsinni najugaqartut nunanit allaneersut sulisussanik taarserneqarnissaat pillugu aalajangiisoqarsimanngitsoq.

- 7. Naalakkersuisut misissorsimavaat soraarsitsinerit taamaattut najukkami suliffinnut, suliffimmi avatangilisunut aammalu peqqinnissaqarfimmi kalaallinik sulisussarsiornermut qanoq kinguneqarsinnaanersut?**

Akissutit

Naalakkersuisut pingaartippaat, pisortat suliassaasa aaqqissuussaaneranni allannguutit paasissutissat tunngavigalugit ingerlanneqassasut, tassani ingerlatsinermut aamma sulisut pillugit kingunerisassat nalilersuinermut ilanngunneqassasut. Naalakkersuisut isumaqarput, eqqarsaatigisassat taakku aalajangiinermut pineqartumut atatillugu ilanngunneqarsimasut, matumani nunatsinni suliffissat, suliffimmi avatangiisit kiisalu atorfinitsitsiniarneq.

Tassunga atatillugu peqqinnissaqarfimmit paasissutissiissutigineqarpoq, nunatsinni najugaqavissunik sulisussarsiornermut aamma sulisut attatiinnarnissaannut tunngatillugu ingerlaavartumik suliniuteqartoqartoq, ilaatigut piginnaasanik ineriartortitsineq suliassanillu nutaanik ineriartortitsineq aqutugalugit.

- 8. Naalakkersuisut suliniuteqassamaarpat pisortat suliffeqarfiutaanni, ilanngullugu Dronning Ingridip Napparsimmavissua, periarfissaqarfiatigut kalaallinik sulisunik atorfinitsitsinissaq attasiinnarnissarlu salliutinneqarnissaat qulakkeerniarlugu?**

Akissutit

Nunatsinni najugaqavissunik atorfinitsitsinissaq aamma taakku suliffeqarfimmi attatiinnarnissaat periarfissaqartillugu tapersersuinarlutik ersarissumik Naalakkersuisunit anguniarneqarpoq.

Anguniakkap ilaatigut Naalakkersuisut politikikkut pingaarnersiutinerni salliutitaanni kiisalu immikkoortortaqaarfinni pilersaarusiornerni aamma ingerlaavartumik aqutsinermut ineriartortitsinermilu takuneqarsinnaavoq, matumani peqqinnissaq pillugu. 2023-mi peqqinnissaq pillugu isumaqatigiissummi atuuttumi sulisut atorfinitsinneqartarnerat aamma attatiinnarneqartarnerat pingaaruteqartumik sammineqarsimavoq.

Matumunnga atatillugu eqqarsaatigineqartut pisortat suliassaasa aaqqissuussaaneranni ingerlaavartumik ilanngunneqartarput, ilaatigut peqqinnissaqarfimmi, kiisalu atorfinitsinerup patajaatsuunissaanut kiisalu aningaasaqarnermut piumasaqaatit tunngavigalugit ingerlanneqartussaanerat peqatigitillugu.

Tassunga atatillugu peqqinnissaqarfiup oqaatigaa, nunatsinni najugaqavissunik atorfinitsitsinissamut aamma taakku suliffeqarfimmi attatiinnarnissaannut tunngatillugu ingerlaavartumik sulisoqartoqartoq, ilaatigut piginnaasanik ineriartortitsineq aamma suliassanik nutaanik ineriartortitsineq aqutugalugit.

- 9. Naalakkersuisut pilersaaruteqarpat suliaq sukumiinerusumik misissorniarlugu aammalu sulisut eqqugaasut eqqortumik aammalu inatsisit isumaqatigiissutillu atuuttut naapertorlugit pineqarsimanersut qulakkeerniarlugu?**

Akissutit

Ilisimatitsissutigineqarsinnaavoq, peqqinnissaqarfiup aqqissuussaannerup allanngortinneranut kiisalu sulisut pillugit naleqqussaannermut tunngatillugu suliap ingerlanera pillugu nassuiaat Naalakkersuisunut nassiussimavaat.

Tamatuminnga tunngavigalugu nalilerneqarpoq suliap ingerlanneqarnera atuuttunut inatsisinut naapertuuttoq naapertorlugu ingerlanneqarsimavoq.

10. Ilumoorersoq Dronning Ingridip Napparsimmavissuani sulisut qallutaatut oqaatsinik atuinnissamik imaluunniit pisinnaasaqarnissamik piumasaqaatinik naammassinninngikkunik soraarsitaanissamut aarlerinartorsiorsinnaasut?

Akissutit

Tamanna eqqortuunngitsoq peqqinnissaqarfimmit ilisimatitsissutigineqarpoq.

Tassunga atatillugu malugeqquneqarpoq oqaatsit pillugit piumasaqaatit suliamut tunngavissaqanngitsut naapertuutinngitsumik assigiinngisitsisoqartumik kinguneqarsinnaavoq, taamaattumillu Naalakkersuisunut suliassaqarfimmi tunngaviusut anguniagaasullu naapertorlugit ingerlanngillat. Naalakkersuisut pingaartippaat, oqaatsit pillugit piumasaqaatit atorineqartut suliassat naammassineqarnissaat eqqarsaatigalugu suliamut naleqquttumik tunngavilersorneqassasut.

11. Naalakkersuisut nassuiaateqarfigissavaat oqaatsit pillugit piumasaqaatit suut aalajangersimasut eqqiaanermut sulisut aammalu napparsimmavimmi sulisut allat pillugit atuunnersut, kiisalu piumasaqaatit taakku qanoq nalilersorneqarlutillu atuutsinneqarnersut?

Akissutit

Peqqinnissaqarfiup oqaatigaa, eqqiaasut kiisalu peqqinnissaqarfimmit sulisut allat pillugit oqaatsitigut piginnaasaqarnissamut nalinginnaasumik assigiimmillu piumasaqaatinik aalajangersaasoqarsimanngitsoq.

Oqaatsitigut piginnaasat pisariaqartinneqartut atorfiup imarisaanut ataasiakkaanut atatillugu kiisalu ingerlatsinermi pisariaqartitanut suliassanik naammassinninnermut attuumassuteqartunut naapertorlugit, ilaatigut eqqiluisaarneq pillugu ilitsersuineq suliffimmilu isumannaallisaanermut tunngatillugu ilitsersuineq ilanngullugit.

12. Naalakkersuisut naapertuututut naleqquttullu isigaat kalaallisut oqaasilinnik sulisut oqaatsinik naammattumik ilisimasaqannginneq tunngavigalugu atorfinitsitaanerminnik annasaqarsinnaanerit, immikkut suliani qallunaatut oqaatsit sulinermi pisariaqavinngitsut eqqarsaatigalugit?

Akissutit

Atorfinitsitsinermut atatillugu oqaatsit pillugit piumasaqaatit suliassat aalajangersimasut naammassineqarnissaat eqqarsaatigalugu suliamut naleqquttumik tunngavilersorneqarsimasariaqartut Naalakkersuisut isumaqarput. Taamaattumik sulisut oqaatsit pillugit piumasaqaatit suliamik

ingerlatsinermut pisariaqartinneqanngitsut tunngavigalugit suliffimminik annaasaqarnerat naapertuutinngilaq imaluunniit naleqqutinngilaq. Ilutigalugu suliassat suliatigut akisussaassuseqartumik pitsaasumillu pisariaqartinneqartoq naapertorlugu naammassineqarsinnaanissaat qulakkeerneqassaaq, tamatumalu kingunerisaanik atorfinni aalajangersimasut oqaatsitigut piginnaasaqarnissamut immikkut piumaasaqaatit pisariaqartinneqarsinnaallutik.

13. Naalakkersuisut suliniutinik sunik aallartitaqarsimappat kalaallisut oqaasilinnik sulisut oqaatsinik tapersersorneqarnissamut aammalu pisinnaasanik ineriartortitsinissamut neqeroorfigineqarnissaat qulakkeerniarlugu soraarsitsinermik taarsiullugu?

Akissutit

Naalakkersuisut pingaartippaat, sulisut piginnaasanik ineriartortitsinissamut naleqquttunik periarfissinneqartarnissaat, matumani oqaatsitigut piginnaasanik ineriartortitsineq, tamanna suliassat naammassineqarnissaannut pisariaqartinneqartillugu. Tamanna peqqinnissaqarfimmi suliassat aaqqissuullugit ingerlanneqartarneranni ingerlaavartumik eqqarsaatigineqartarpoq.

Tamatumani atatillugu peqqinnissaqarfik paasissutissiivoq sulisut piginnaasaanik ineriartortitsinissamut ilinniaqqinnissamullu periarfissinneqarnissaat ukkatarineqartoq, ilanngullugu oqaatsitsigut tapersersorneqarnissaat tamanna pisariaqartinneqartutut nalilerneqarpat. Naalakkersuisut isumaqarput piginnaasanik ineriartortitsineq, sapinngisamik soraarsitsinermut taarsiullugu atorineqartariaqartoq.

14. Naalakkersuisut qanoq ilillutik qulakkiissavaat pisortat suliffeqarfiutaanni oqaatsit pillugit piumasaqaatit kalaallit sulisunik tunngavissaqanngitsumik assigiinngisitsinermik kinguneqannginnissaat?

Akissutit

Naalakkersuisut pingaartippaat, pisortat suliffeqarfiutaanni oqaatsit pillugit piumasaqaatit aalajangersarneqartarnissaat, taakku suliassat aalajangersimasut naammassineqarnissaat eqqarsaatigalugu suliamut naleqquttumik tunngavilersorneqarsimassapput.

Tamanna ilaatigut qulakkeerneqartarpoq Naalakkersuisut pisortat ingerlatsineranut tunngatillugu ataatsimut tunngaviliinermut tunngaviusullu aqqutigalugit, tassanilu suliamut tunngassuteqarnissaq naapertuutsitsineq naligiimmillu pingeqarnissaq pingaarnerpaamik tunngaviussapput. Taakkua tunngaviusussat iluanni suliffeqarfiit ataasiakkaat akisussaaffigivaat suliassat qanoq ingerlanneqarnissaat aaqqissuutissanerlugit.

Peqqinnissaqarfik matumunnga atatillugu paasissutissiivoq, sulisut pillugit
aalajangiinerit tamarmik suliamut naleqquttumik tunngaviusullu naapertorlugit
ingerlanneqartarnissaat pingaartinneqartoq, taamaaliornikkut
naapertuutinngitsumik assigiinngisitsinissaq pinngitsoortinneqassaaq.

Inussiarnersumik inuulluaqqusilluta

A handwritten signature in black ink, appearing to read 'Jens Frederik Nielsen', written in a cursive style.

Jens Frederik Nielsen